

SANDE 2 BILONG ISTA

1. RIT

Ap 5:12-16

Akar dapanim: Gumazamzir avirim ua nighnizir gavgavim Ekiamin iti, egha an adarazir aven izi.

Akar kam, an Aposelbar Ingangaribar Akinafarimin aven iti.

Aposelba mirakelin aviriba ko digavir kuram gamir bizir aviriba, gumazamizibar tongin dagh ami. Ezi nighnizir gavgavim Iesusin itir gumazamiziba, me Solomonin Azuarimin zurara uari akufti. Gumazir igharaziba, me ko poghasa tong nighnizir puvati. Me men ziaba fava egha fo, me arazir aghuim gami. Marazi me ko poghan aghua, ezi avirim nighnizir gavgavim Ekiamin ikia men aven zuima, men dibobonim bar ghuavanabo. Ezi kamaghin gumaziba

arimariar gumaziba inigha men misiaba ko akuriaba sara me atera izava tuavimin miriamin me arisi. Me kamaghin nighnizir gavgavim iti, Pitan nedazim me gisin mangiti me ua deragham.* Ezi uaghan Jerusalem torim gatizir nguibar dozibar gumazir avirim, me uan arimariar gumazamiziba inigha ize. Egha uaghan uan gumazamizir duar kuraba apazaziba inigha izezima, me bar moghira ghuamaghegha dera.

Kar Godin Akam.

SAM

Sam 118:2-4, 22-27

Ia akam ikaragh: Ekiam zurara e gifonge, kamaghin e minaba.

E Israelian gumazamiziba, e kamaghin mikim suam,
“A zurara en apangkuvigha mamaghira iti.”
Aronin adarazi uaghan kamaghin mikim suam,
“A zurara en apangkuvigha mamaghira iti.”
Gumazamizir Ikiavira Itir Godin atiatiba e bar moghira uaghan kamaghin mikim suam,
“A zurara en apangkuvigha mamaghira iti.”

Ia akam ikaragh: Ekiam zurara e gifonge, kamaghin e minaba.

Kar dipenir akinir ingangarir gumaziba aghuazim,
a datirighin dipenim aterir guarim gava.
Ikiavira Itir God uabi bizir kam gamizima an oto.
Ezi e an garima, a bar dera.
Ikiavira Itir God uabi, dughiar aghuir kam e ganingi.
Kamaghin en naviba deraghti, e bar akuegham.

Ia akam ikaragh: Ekiam zurara e gifonge, kamaghin e minaba.

O Ikiavira Itir God, ni en akurvaghasa e nin azangsisu.
 Ni en akuraghti, bizir e amiba, da bar deragham.
 E ghaze, gumazir Ikiavira Itir Godin ziamin izim, God deragh a damu.
 E Ikiavira Itir Godin Dipenimin ikia, gumazir kamin ziam fe.
 Ikiavira Itir God, a uabira guizbangira God.
 A bar deraviram e gamua an angazangarim e gisira.
 Kamaghin, e bar akongegh temer aguabar suigh ofa gamir dakozimin miriabagh
 ighiraruam.

Ia akam ikaragh: Ekiam zurara e gifonge, kamaghin e minaba.

2. RIT

Re 1:9-13, 17-19

Akar dapanim: Ki fomira aremezir gumazim, egh datrighn ki zurara angamra iti.

**Akar kam, a Mogomer Akar Aghuriaghirizimin Akinafararim, o Revelesen, an
 aven iti.**

Ki Jon, ki ian aveghbuar mam.
 Ki ia ko, e Kraisin adarasi. Ki ia ko
 porogha, mizaziba isa, egha ia ko God
 Bizibagh Ativir Dughiamin aven ikia
 Godin apengan iti. Egha ia ko porogha
 osimtiziba atera tugha gavgafi. Ki
 Godin akam akura, egha Iesusin gun
 migeir akam, ki an eghurigha an gun
 migia ghaze, akar kam a guizbangira.
 Kamaghin amizi me na batuegha na
 isa Patmosin Arighatizimin na ati.*
 Ekiamin dughiamin, Godin Duam na
 gizivagha pamten nan ingari, ezi nan
 girakirangin ki tiarir mam barazi a
 sigham min pamten kamaghin dei.
 Tiarir kam kamaghin migei, "Bizir ni
 garir kaba bar, ni akinafarimin da
 osirigh, egh 7 plan siosba bagh da
 amangigh. Siosin Efesusin nguibamin
 itim, ko Smernan nguibamin itim,
 ko Pergamum ko Taiataira ko Sardis
 ko Filadelfia ko Laodisian nguibamin
 itiba."

Ezi ki gumazir na migeimin ganasa
 egha ragha gari, golin lamin 7 pla iti.

Ezi ki gumazir mamin garima, a lambar
 tongin tughav iti. A Gumazibar Borimin
 min gari. A korotiar ruarim aruzima an
 an sueba avara, ezi a golin letiam uan
 evarim amighiri.

Ki an ganigha an suemningin
 boroghin irigha, gumazir ovengezimin
 min iti. Ezi a uan agharir guvimin
 na gisin atigha, egha kamagh migei,
 "Ni atiatingan marki. Ki gumazir
 faraghavira ikia, egh bar gin ikiva, egh
 abuan ikivira ikiam. Egha ki gumazir
 angamra itim. Fomira ki areme.
 Datirighin ni gan, ki zurara angamra
 ikivira ikiam. Ki Ovevemin ki, koma
 Gumaziba Ovia Ghua Itir Nguibamin ki,
 ki aningn suiragha aningn ganamin
 gavgavim iti.

"Kamaghin amizi, ni bizir ni ganizir
 kabar Akaba osirigh, bizir datirighin
 itiba ko bizir gin otivamiba.

Kar Godin Akam.

WELKAMIM GUTNIUS

Aleluia, Aleluia.

"Tomas, ni nan ganigha givagha, datirighin nighnizir gavgavim nan iti? Ezi gumazamizir na ganizir puvatiziba nighnizir gavgavim nan itiba me bar akongegh." *Aleluia.*

GUTNIUS

Jo 20:19-31

Akar dapanim: Dughiar 7plan gin, Iesusin suren gumaziba uari akuvazima, Iesus men tongin tughav iti.

Ia, Krais Iesusin Akar Aghuir Jon osirizim, a baragh.

Ezi Sanden guaratizimin aminim pirigha gifa. Ezi suren gumaziba me Judabar atiatingi, egha dipenir me itim, me pamten an tiar Akaba ase, eghti azenan itir gumazitam aven izan kogham. Ezi Iesus iza pura suren gumazibar tongin tughav iti. Egha a kamaghin me migei, "Ian naviba amiragh iki." A kamaghin migia, uan duar torir dafarimningin itimning ko duar ivir vuemin itim, men aka. Ezi suren gumaziba Ekiamin ganigha me bar akonge. Ezi Iesus ua me migei, "Ian naviba amiragh iki. Afeziam na amadazi ezi ki ize. Ezi kamaghira ki ia amadima ia zui." A kamaghin migia, egha uan aminim men a giveragha, men amada, egha kamaghin me migei, "Ia Godin Duam uan navir averiabar a inigh. Egh ia gumazamizibar arazir kuraba gin amadagham, eghti God uaghan men arazir kuraba gin amadaghti, da ua puvatigham. Eghti ia men arazir kuraba gin amadaghan koghti, men arazir kuraba ikivira ikiam."

Dughiar Iesus uan suren gumaziba batozim, men 12 plan suren gumazibar mav, a me ko itir puvati. Kar Tomas, an ziar mam Fufuzim. Ezi suren gumazir igharaziba kamaghin Tomas migei, "E Ekiamin ganigha gifa."

Ezi Tomas kamaghin me migei, "Ki an duar torir me an dafarimning gafuzimizingin ganighan koghiva, egh ki uan dafarpuzim an duar torimning datighan koghiva, egh ki uan dafarim an ivir vuemin itir duam datighan

koghiva, egh ki nighnizir gavgavim ikian kogham. Bar puvatigham."

Ezi 7 plan dughiaaba givazima, suren gumaziba ua dipenimin aven iti, ezi Tomas me ko aven iti. Me tiar Akaba bar pamten da asegha gifa. Ezi Iesus iza men tongin tughav iti. Egha me migei, "Ian naviba amiragh iki."

Egha a kamaghin Tomas migei, "Ni uan dafarpuzimin kagh suiragh, egh ni nan dafarimningin ganigh. Egh ni uan agharim amadagh uan dafarim nan ivir vuemin itir duam datigh. Ni nighnizir pumuning ikian marki. Ni nighnizir gavgavim nan iki."

Ezi Tomas kamaghin an akam ikara, "Ni nan Ekiam. Ni nan God."

Ezi Iesus kamaghin a migei, "Ni nan ganigha gifa, egha ni nighnizir gavgavim nan iti, o? Gumazir na ganizir puvatiziba, me nighnizir gavgavim ikiva, egh gumazir kaba bar akuegham."

Iesus mirakelin avirir maba uaghan suren gumazibar damazimin dagh ami. Ezi ki bar Akinafarir kamin da osirizir puvati. Egha, akar ki osirizir kam, ki ia nighnizir gavgavim Iesusin ikiasa, ki an osiri. A Gumazir God Uam E Iniasa Misevezim, a Godin Otarim. Eghti ia nighnizir gavgavim an ikiva, egh ia an ziamin zurara itir ikirimirir aghuarim iniam. Ki kamagh sua, akinafarir kam an osiri.

Kar, Krais Iesusin Akar Aghuim.

